

# QUÆSTIO MEDICA,

*Quodlibetariis Disputationibus manè discutienda in Scholis  
Medicorum, die Jovis 17 Novembris 1718.*

M. JOANNE-MATHÆO LE BERT,  
Doctore Medico, Præside.

*An functionum integritas à spiritibus ?*

## I.

**E**LEGANS automaton Corpus humanum stupendi artificii : hæc machina hydraulico-pneumatica motum habet à sanguine & spiritibus. Tota constat ex fibris & tubulis. Cor primum circuitus agens : indefinente sanguinis impulsu ad cerebrum, jugis est spirituum procreatio, quorum copia opus suum concitata quæque pars integram edit functionem. Scilicet ut communia partibus omnibus, sic ad omne opus necessaria instrumenta, spiritus. Sed horum indoles æthereæ, mobilis, ut affluunt celeriter, celeriter effluunt; nisi que continuâ instauratione compensentur, tuendæ vitæ, corpori sustinendo, impares. Hinc ut alimenti sic capefcendi somni venit æqua necessitas. Alimento in sanguinem, sanguine in spiritum verso, quod ipsi decesserat corpori, accedit robur, & ligatis impeditisque per somnum sensibus, opposito velut agere sistuntur spiritus, prohibeturque effluvium. Sic lassum paulò ante, penèque deficiens animal, post somni peracta munia, integrum surgit & vegetum; si quidem plenius uberiorisque suis in ergastulis coacervati spiritus, ad officia alacrius redeunt.

## I I.

**F**UNCTIONES aliæ independenter à voluntate exercentur, nonnullæ voluntatis nutum sequuntur. Ad has & illas requiritur fibrarum debitus tonus, liquidorum affluxus, liber humorum circuitus. Quò liberiùs vasa permeat sanguis, eò faciliùs functio peragitur: quò meliùs à naturâ disposita organa, eò perfectiùs proprias functiones edunt. Sanguinis circuitûs, fibrillarum oscillationis causam, nullus est sanæ mentis, qui in spiritus non refundat. Spirituum affluxu distenta turget fibra nervea, contrahitur, intumescit ventres, musculus; in motus vermiculares aguntur intestina; cessat jugis ille ad partem spirituum affluxus? languet iners, flaccescunt fibræ, concidunt glandulæ, dividendis & attenuandis humoribus impares succo hæterogeneo replentur, crudo humore turgescunt: Prima obstructionum origo. A viscido sanguine, pituitosisque humoribus referto, quot & quanta mala humanum genus cruciant? Minus liberè tunc per universum corpus distribuuntur spiritus animales. Hinc coquendi difficultas in stomacho, imperfecta bilis in hepate secretio, succi pancreatici in pancreate, imminuta vel suppressa insensibilis perspiratio. Quàm longè graviora accidunt incommoda, si nulli in cerebro secernantur spiritus. Affecto sensorio communi, præpedito spiritibus influxu, decumbit quasi mortuum animal apoplexiâ percussus brevi, ni citò succurratur, periturum.

## I I I.

**S**INGULÆ corporis partes diversis muniis obeundis à natura destinatæ: tam arctum habent inter se commercium, ut una ab aliâ in officio pendeat. Partes omnes fons nutritius sanguis irrorat & alluit, ipsis nutrimentum suppeditando. A corde ad extrema corporis pellitur. Sed unde motus cordis? Totus pendet à spiritibus. In cerebri medullari substantiâ illi secernuntur. Secreti per proprios canales, nervos dixere, ad omnes corporis partes ruunt. Ipsi oscillant, tenduntur, crispantur, convelluntur, contrahuntur, ac retrahuntur fibræ; in motum agitur quidquid oscillat in cor-

pore ; pulsant cor & arteriæ ; muscoli quotquot sunt moventur. A sanguine diversi liquores per propria secernuntur in-  
cunicula , per excretoria superflui excernuntur , crudi concoquuntur , crassiores attenuantur. Perfectâ tunc gaudet sanitate vegetum animal. Cùm autem cessat jugis spirituum animalium influxus ; vel volenti motu , diuturno exercitio , vigiliis immodicis depauperatur sanguis : tardo circuitu agitur , vix pulsat cor , flaccida partium omnium substantia , languet effectum animal : corpus jacet iners , ni spirituum jactura restauretur , citò periturum.

## I V.

**S**ICUT spirituum fons , sic somni sedes cerebrum , ad secernendas partes sanguinis subtiliores destinatum : has spiritus animales vocant. Ab uno eodemque principio , instar hnearum , ducuntur nervi : hoc sensorium commune meritò appellares. Vivido ac jugi circuitu , musculorum indefinenti motu attenuatus , divisus sanguis copiosorem spirituum materiam suppeditat. Corpus callosum propriis rivulis subeunt spiritus , per nervos postea ad varia organa distribuendi. Cùm verò sanguis eundo depauperatur , languent functiones ; vel si crassus chyli partibus adhuc involvantur , minori copiâ per nervos affluunt : hinc ad munia obeunda impares. Tunc languido gradu fluens sanguis , quasi hebetum reddit animal , somnoque obrutum jacet iners. Vacant tunc ab opere organa sensibus externis destinata , cessant functiones animales. Partium vitalium fibrillæ spiritibus tunc magis turgidæ , vividius actus suos exerunt ; arteriæ validius pulsant : cor contrahitur arctius ; ipsiusque alterno motu , arteriarumque successivo tritu , magis ac magis dividitur sanguis : partes ipsius tenuiores sic divisæ ac comminutæ , in cerebri glandulas facilius irruunt ; quibus per nervos affatim distributis , tenduntur omnes corporis fibræ propriis functionibus de novo exequendis aptæ.

## V.

**R**EFECTIONIS igitur necessaria ratio , somnus , oclusis corporis totius ostiis , ipsius egregiè sumptibus parcens. Hac de causâ noctes diesque se se vicissim excipientes amavit ca-

duca viventium natura, ut diurnos experta labores, profundo noctis silentio quieti captandæ quasi provocata quiesceret, utriusque vicissitudine vigeret. Sic cadente de montibus umbrâ, quasi quiescere monitum animal, moveri cessat, ac sensim languentibus partibus sensus otiosi fiunt. Interim natura non alienis distracta rebus, totâ domesticis incumbit, ingesta felicius coquit alimenta; unde laudabilis cum sanguine permixtus chylus, mox in spiritus animales elaborandus deferretur, donec sufficienter resarcita natura, ad exteriora de novo propellat. Sic quieti succedit motus, qui sopitas partes titillando excitat, humores recreat, partibusque singulis dispensat. His tamen alternis uti animal necesse est: nimio somno languerent partes, fibræque nimis flaccidæ sensationis expertes forent; sed tota vanesceret virtus partium elastica, si immodicis implicatum vigiliis animal nusquam somni quiete frueretur, dissipatque continuò viribus, fatisceret facultas omnis, rueretque tota animalis œconomia.

*Ergo functionum integritas à spiritibus.*

### DOMINI DOCTORES DISPUTATURI.

M. Hyacinthus Theodorus Baron, Professor designatus.	M. Joannes - Franciscus Coutier, Pharmacia Professor.	M. Alexius Littré, Regia Scientiarum Academia Socius.
M. Joannes - Nicolaus de la Hire, à Regiâ Scientiarum Academia.	M. Joannes-Baptista Mon- gin, Medicus Regis ordinarius.	M. Petrus - Joannes Buvette, Professor Regius, & à Regiâ Scientiarum Academia.
M. Antonius Geoffroy.	M. Alexander le François	M. Petrus Marais.

Proponebat Parisiis PETRUS MALOET, Claromontanus, Baccalaureus  
Medicus. A. R. S. H. 1718, à sextâ ad meridiem.